

I chuka, ov lel i papin, zhal othe, mukel la i zharela les te avel. Dikhlas les othe, kay avela, mukhela e papinya i garavela pes. O choro rom pale kato resto zhi ki prut phenela peske:

– A be, zomka bresh nakhava atar prut sa phuterde yakhentsa. Ayde pale kavka drom te nakhav phanle yakhentsa, te dikhav dali mozhe te nakhav chuka.

I phandela pe yakha i nakhela bez te dikhel e papinya. I o argati e barvaleskoro phenela:

– Eh, manushes kana nanay les kasmeti, nanay te ovel da les.

I lel e papinya, irinela la e barvaleskere khereste. Vakerela leske sar so si i buti – sar so ulo. Togava o barvalo rom phenela:

– Ingal la leske khere, mukh i tepsiya anglal ko udar, chukine i nash.

O argati da lel i papin, zhal leske kheres, chukinela leske ko udar, mukela i tepsiya i garavela pes. Ola phutrena o udar i kana so dikhena – tepsiya papinyasa. Loshasalilo o choro rom. Hulavel andre i papin. O chhave kay dikhle, lile te ripinen, te loshanen, sare beshte turyal ki masa – mangena te han. I ov veche taman lilas i chhuri te chhinel o mas i... o-o-op, alo leske aver godi. Phenela:

– Romnye, chaches si! Akana amen ka has, ka mudaras amen hab-nastar, ama tasya pale bokhale ka ovas. Po-shukar si, – phenela – te zhav, te biknav la e komshyaske da, sar na pipindzham nishto, sar si peki shukar. Ka lav lestar pares, ka kinav ekh gono yaro, ka kinav kompirya, chhi aver da, ta ka ikalas sasto masek.

I romni da phenela:

– Chaches si, chuka ka ovel nay-shukar.

I lel e papinya, zhal ko komshyas:

– Komshi, de man bish levya, ake tuke kayka peki papin. Dikh so shukar si! Dikh savi bari si, shukar si peki da, taman Dzhadiyake.

O komshiyas da, kato dikhlas, pale khandindilo leske shukar da, a pale bish levya nanay nishto, del les o pares i vikinel pe romnya, pe chhaven, te beshen, te han, te pien.

Hale, hale so hale, pale o frolya lile te iklyon. I kato dikhle davka, lile te loshanen. Lachhes, ama o komshiyas sine chestno rom, lachho, ahavdo, stabilno i phenela:

– Shunen, kavka kasmeti si e choreskoro. Ov te zhanelas kay si frolya andre, nanayas te biknel la mange bishe levange. Leskoro si peske o kasmeti. Ka ingalav len leske. Amen isi, dinyas o Devel. O Devel mangela te del les da akana.